



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 7

Omar Abdullah Baramulla Lok Sabha menden nungji tokteptsü

US Tir Biden-i Philippines aser Japan yaritsü nangzük



VOL. XXI ISSUE NO. 180 (ADOK 180) DIMAPUR

KÜPTOKNÜ (SATURDAY)

RONGCHII (APRIL) 13, 2024

₹ 5.00

ENPO-i Nagaland state sorkar dak tai tongloksür

Dimapur, April 12, 2024 (TYO): Model Code of Conduct metenzük dang Frontier Nagaland Territory (FNT) mapa meküm tetba ya Nagaland sorkar ajanga lir ta Eastern Nagaland People's Organization (ENPO)-i metetdaksüogo.

Yaküm December ita Ministry of Home Affairs (MHA)-i Nagaland sorkar nem FNT indang draft MoS agütsü aser iba atema December 31, 2023 matong dang tebilembatem ashitsü mapang züngzüksü ta ENPO-i ashi.

Ajisüaka, state sorkari India sorkar nem draft MoS atema tebilemba ano melemsatop aser iba jagi Lok Sabha 2024 atema Election Model Code of Conduct

mebenok dang mapa meküm tetba ENPO-isa ashi.

MHA-i ENPO dang nangzükba ama Election Model Code of Conduct metenzük dang Frontier Nagaland Territory angatetteper alitsüba asü. Iba jagi Eastern Nagaland nung alirtemi February 23, 2024 nü Chenmoho yimtsüng nung Central mesüra State Election kecha nunga shilem magitsü bangjemtepa liasü aser Iba bangzüngji March 19, 2024 nü Tuensang Hq nung agishiogo ta ENPO-i metetdaksü.

Brihostibarnü public senden ka ayonga amendang Chenmoho Resolution akangshiogo aser onoki Eastern Nagaland public bangzüng nungi masetsütsü ta ENPO-isa metetdaksü.

Dimapur Police-i NH-29 atema tetuyuba agütsür

Dimapur, April 12, 2024 (TYO): Commissioner of Police, Dimapur-i Airport Junction anasa NH-29 nung ali anenoka aidak mapa inyaksü dak sendakba nung traffic tetuyuba aser tenok dangba kar agütsüogo.

April 14 nungi April 15 tashi Airport Traffic Point nungi 3rd Mile Traffic Point tashi lenmang achijilen Dimapur leni aoba gari mesenzütsü ta Dimapur Police-i metetdaksüogo.

Chumoukedima aser Dimapur tsütsü senzüba garitem asoshi NH-29 nung lenmang tabelenlen single lane ama garitem senzütsü. 3rd Mile Junction nungi Airport Junction

tashi lenmang nung gari manendaksütsü, ta parnoki ashi.

Chekiye Village Main Gate nungi adokba garitem Dimapur leni aotsü saka Dimapur/Chumoukedima nungi Chekiye Village area-i aoba garitem tanga lenmangtem ajanga senzütsü ta Dimapur Police-isa ashi.

Lenmang yanglushiba mapang anepdang 7:00 ako nungi aonung 9:00 ako tashi Dimapur telungi gari tulutem maitdaksütsü saka iba nung school bus aser emergency service garitem madener ta Dy. Commissioner of Police (Crime)/PRO, Dimapur-i metetdaksüogo.

Dy. CM Y Patton-i Manipur nung nüboyimtsü

Guwahati, April 12, 2024 (Agencies): Nagaland Deputy Chief Minister aser BJP lennir Y Patton-i Hokolbarnü Outer Manipur constituency nung NPF aser NDA candidate Kachui Timothy Zimik atema nübo yimtsüogo.

Prime Minister Narendra Modi-i North East India asoshi temulung kanga agütsüogo aser pa lenisüba kübok tesüba küm 10 tsüngda kanga renlokogo ta Y Patton-i ashi.

BJP ya Hindu party ka lir lira

ser Khristantem anemer ta Congress-i olulu prokshiba ajanga Khristantem manisadaksütsüla ta Patton-isa ayongzük.

BJP-i teti secularism nung ajemdaksü aser democracy atema inyaksü. BJP-i Manipur state renloktsü atema temulung agütsütsü ta paisa nangzük.

Paisa nübortem dang Northeast region aser talisa Manipur renloktsü atema Kachui Timothy Zimik nem vote enoktsütsü mepishia metetdaksü.

Nagaland BJP-i Nalin Kohli den senden amen

Dimapur, April 12, 2024 (Agencies): Hokolbarnü Bharatiya Janata Party (BJP) Nagaland State-i BJP national spokesperson aser Nagaland in charge Nalin Kohli den senden ka menogo.

Nagaland state president Benjamin Yepthomi menden ser ameba senden nung April 13, 2024 nü Agri Expo, Chumoukedima nung NDA rally agitsü aliba atema jembitep.

Benjamin Yepthomi-i Nalin Kohli pelaa agizükba den party züngsemtem (Karyakartas) dang national BJP president J.P Nadda

arutsü aliba sentong takok ngudaksütsü ayongzük.

Nalin Kohli-i state nung ketdangpur tasentem nem tenüngsang agütsü aser party tangatetba nung ajemdaksü aser Karyakartas tsüngda amalitepa inyaksangshitsü ayongzük.

April 13, 2024 nü NDA rally nung National BJP President J.P Nadda, National Spokesperson & Prabhari in charge of Nagaland Nalin Kohli, deputy chief minister & BLP leader Yangthungo Patton aser state president Benjamin Yepthomi nungeri o jembitsü.

NDPP-i BJP den sendaktepba nung tia kecha mali: T.R Zeliang



April 12, 2024 nü Peren kübok Ngwalwa jila nung T R Zeliang-i PDA consensus candidate Dr. Chumben Murry atema nüboyimba sentong nung o jembiba angur.

Dimapur, April 12, 2024 (TYO): NDPP ama regional party kati BJP ama national party ka den tesentaktep ayuba nung tai kecha mali ta Deputy Chief Minister T.R Zeliang-i ashi.

Tesüiba nunga Nagaland ama state tila nung sorkartemi Centre nung sorkar yimsü asüba central party den tesentaktep yua aruogo ta pai ashi.

Hokolbarnü Peren kübok Ngwalwa jila nung Lok Sabha election atema nüboyimba sentong ka nung "asenoki Centre den tesentaktep tajung meyura Nagaland ama state tila kati yimten latetsü mesüra terenlok

mapa inyaksü makoktsü" ta TR Zeliang-i ashi.

Naga yimten telok 24 lir aser iba ajanga asen rongsenketzung nung timtem ajurur. Asenoki Nag yimten latetsü atema melongjemra tarutsü putui asenok dang tai madoktsü, ta pai ashi.

"NDPP ya regional party ka lir aser Naga nung taginüba kümzüka ayutsü atema tentet. Tanü NDPP-i BJP den tesentaktep lir aser iba ya terenlok atema aser asen temetenten kümzüka ayutsü atema lir. Talisa iba tesentaktep ya Naga yimten latetsü atema lir"

ta Zeliang-i ashi.

Nagaland nung temelenshi aika adoker aser sorkari mapatong tasen aika inyaksü meranger. Sorkari Nagaland Foothill Road (Tuli-Niuland portion) atema tang teinyakdak lir aser iba atema Consultant mulunga agizükogo aser MoRTH nem DPR agütsüogo, ta paisa ashi.

1963 nungi 2003 tsüngda Nagaland nung National Highways 5 liasü saka tanübo National Highways 12 kümogo aser itemji NH, PWD kübok 7, NHIDCL kübok aser BRO kübok 1 lir ta paisa ashi.

Four lane road pezü renemogo aser itemji Dimapur-Chumoukedima, Dimapur bypass Dillai Gate - Patkai College Junction (99%) aser Patkai College Junction - Kohima lir ta TR Zeliang-isa ashi.

Nagaland state anguba sülen Medical College ka danga maliasü saka tanübo Kohima Medical College lapokogo aser Mon Medical College yangludat. Item ajak ya Prime Minister Narendra Modi temoatsü ajanga SARDP-NE kübok inyakba lir, ta paisa ashi.

Pradhan Mantri Garib Kalyan Anna Yojana (PMGKAY) kübok Prime Minister Narendra Modi-i jangotsü angati agütsür ta Zeliang-isa ashi.

DMC Photo Electoral Roll indang Final Publication sayaogo



Administrator & Electoral Registration Officer, Dimapur W. Manpai Phom, NCS-i EAC, Dimapur Imtjungla aser political party lennirtem tsüngdang Dimapur Municipal Council Photo Electoral Roll indang Final Publication sayatsüba angur.

Dimapur, April 12, 2024 (TYO): April 12, 2024 nü Dimapur Municipal Council Photo Electoral Roll indang Final Publication sayaogo.

DMC Administrator aser Electoral Registration Officer office nung Final Publication saya aser iba indang qualifying date ji 01/01/2024 lir. Iba sentong nung EAC,

Dimapur Imtjungla aser political party balala nungi lennirtem aden.

Election tiptema agitsü atema electoral roll ya kanga tongtipang lir ta DMC Administrator aser Electoral Registration Officer W. Manpai Phom, NCS-i ashi.

Dimapur Municipal Council Photo Electoral Roll nung additions, deletions & corrections amala temelenshi aika süogo ta pai

ashi.

Dimapur nung ward 23 lir aser Final Publication nung ajemdaker urban municipal elections agitsü. Kulikaket tejangja nung ajemdaker ang electoral roll nung temelenshi süogo ta Manpai-isa ashi.

W. Manpai Phom-isa electoral roll renemba nung shilem agir ajak dang pelaba metetdaksü.

Imtinaro T Longkumer-i NEZCC Young Talented Artist Award 2021-22 angu



Dimapur, Rongchii/April 12 (TYO): North East Zone Cultural Centre (NEZCC), Shilpgram, Guwahati nung North East Zone Cultural Centre Young Talented Artist Award 2021-22 sempet agütsüba sentong ka March 24, 2024 nü agidang Hill Theatre Nagaland nungi Imtinaro T Longkumer-i Theatre nung North East Zone Cultural Centre Young talented artiste award for the year 2021-2022 sempet agizüka liasü.

Iba sempet ya Nagaland Angh La Ganesan-i agüja liasü.

Imtinaro T Longkumer ya SD Jain Girls College, Dimapur nung BA azüing aser USTM Ribhoi nung MA azüing.

La ya Bendang Walling-i direct asüba theatre production 'Don't Women, No Cry', 'Jina Etiben nung tongti shilem agia lir.

Imtinaro T Longkumer ya Shankar Barua-i 2016 küm direct asüba feature film The Curiosity Shop nunga shilem agia liasü.

Lai Senmang (Bendang

Walling-i direct asüba) aser Way Back Home (Sandep-i direct asüba) amala short films/documentary nunga shilem agia lir. Way Back Home ya Kolkata International Film Festival nung best shiort film, best director aser best lead actress sempet ngua liasü.

Maneni Bendang Walling-i direct asüba web series Dreams and Chaos nunga lai shilem agia lir, koba Kashi International Film Festival nung best web series sempet ngua liasü.

Mkg nung April 15 nü polling personnel training agitsü

Dimapur, Rongchii/April 12 (TYO): 18th Lok Sabha atema General Election 2024 agitsü aliba mechi Mokokchung district kübok polling personnel ajunga atema 3rd Phase training ya April 15, 2024 nü agitsü, ta Deputy Commissioner aser District Election Officer, Mokokchung, Thsuvise Phoji-i sangdong ka nung ashi.

Mayangnokcha GHSS, Mokokchung nung Presiding

Officer (tetsür aser tebur) atema training ya April 15 anepdang 9:30 ako nungi tenzüksü aser 1st Polling Officers (tetsür aser tebur) atema training ya anüingdang 12:00 nungi tenzüksü.

2nd Polling Officers (tetsür aser tebur) atema training ya nikongdang 1:00 ako nungi tenzüksü aser 3rd Polling Officers (tetsür aser tebur) atema training ya kasa Mayangnokcha GHSS,

Mokokchung nung nikongdang 2:00 ako nungi tenzüksü, ta sangdong ajanga ashi.

Anungji departmental Nodal Officers temi pei department nung requisition süa aliba ketdangsürtem dang iba training indang metetdaksütsüla, ta ashi.

Training nung madener nem Representation of the People Act, 1951 indang Section 134 nung mela aliba ama temerenshi agütsütsü.

Voters awareness atema Wokha nung walkathon sentong ka ayongzük

Dimapur, Rongchii/April 12 (TYO): Lok Sabha 2024 atema General Election agitsü aliba asoshi Systematic Voters Education and Electoral Participation (SVEEP) inyakym nung shilem ka ama awareness agütsütsü aser voters tem arua vote agütsütsü ajungmesoa Deputy Commissioner, SDO (C) Nodal Officer for SVEEP aser District Election Officer, Wokha nungertemi anir walkathon sentong ka ayongzüka liasü.

Iba sentong ya Police Point, Wokha nung tenzük aser NST junction nung tembang, kong Wokha district kübok school balala nungi kaketshir aser tesayurtem aser department balala ketdangsürtem shilem agia liasü.

Iba sentong nung jembidang Deputy Commissioner & District Election Officer Wokha, Ajit Kumar Rajan, IAS ajanga kaketshirtemi shilem agiba atema tenüngsang agüja liasü.

Elections ya democracy tamendak dak lir aser senso ajunga atema lir, anungji ochishia yimya tajung nung iba inyakym nung shilem agitsüla, ta pai ashi.

Pai nübur ajunga dang iba election nung shilem agitsü ayongzük aser nisung shia indang vote ya tongtipang lir ta ashi.

Sub-Divisional Officer (Civil) & Nodal Officer (SVEEP), Wokha, Nuhuta Tunyi-i iba sentong nung jembidang, aruya aliba Lok Sabha election atema terenemshiba nung Systematic Voters' Education and Electoral Participation (SVEEP) indang shilem ka ama ayongzük, ta ashi.

Election koda tongtipang ta asüba nüburtem nem angatetdaksütsü aser nisung ajak arua vote agütsütsü asoshi awareness agütsütsü nükjidong nung iba sentong ya ayongzük, ta pai ashi.

Nüburtem nem angatetdaksütsü aser voters

tasentem aser kaketshirtem nem pei temeden angatetdaksütsü asoshi ibai sapang ka lir, ta ashi.

Tunyi-i lanurtem dang pei indang voting rights amshitsü aser candidate tetemsü shima temelenshi arudaksüba nung shilem agitsü ayongzüka liasü.

Kasa sentong nungsa Libemo Memorial School, Wokha nung April 5, 2024 nü essay aser slogan zülutepba nung takok angurtem osang sangdonga liasü.

High School Category nung Class 9 nungi Areni T Kikon-i mezüingbuba jenjang angu, Class 9 nungi Lireni M Ngullie-i tanabuba aser Class 10 nungi Lumchamo S Khuvung-i tasembuba jenjang ngua liasü.

Higher Secondary Category nung Class 12 nung azünger Epibeni Humtsoe-i mezüingbuba jenjang, Class 12 nung azünger Tahara Begam-i tanabuba jenjang aser kasa class nungisa Mhachoni Ngullie-i tasembuba jenjang nguteta liasü.

Niuland DPDB senden thinener

Dimapur, Rongchii/April 12 (TYO): Niuland District Planning & Development Board senden April ita atema

April 15, 2024 nü amentsü aliba Lok Sabha Elections mechi thinener, ta sangdong ka ajanga ashi.

Mkg nung SVEEP Inter-College Debate Competition agi

Dimapur, Rongchii/April 12 (TYO): SVEEP Inter-College debate competition ka Town Hall, Mokokchung nung April 10, 2024 nü agia liasü.

Iba sentong nung jembidang, lanurtem nem election inyakym shidak angazükdaksütsü aser lanur asüding awareness agütsütsü nükjidong nung iba tetoktepba ya ayongzük, ta ADC Mokokchung, Chumlamo Humtsoe-i ashi.

Assistant Commissioner Mokokchung, Ajit Kumar-i voters awareness indang onük nung jembidang, nisung ajak dang pei vote agütsütsü temeden amshitsü ajungshi aser vote ajanga yimtenren aser lokti nung temelenshi bener arutsür, ta ashi.

Election tajungtiba aser tesunep nung agitetsü sorkar ketdangsür mapa aser senso ajaki vote agütsütsüla, ta pai ashi.

Iba debate competition nung People's College, Fazl Ali College, Mokokchung College of Teacher's Education, Shisalen Riju aser Jubilee Memorial College nungi shilem agia liasü.

Fazl Ali College nungi Asensor nem best speaker sempet agütsü aser Jubilee Memorial College nungi runner-up team nung Yimyatetla Sanglir aser Medemren Longchar na liasü.

Iba tetoktepba nung tematiba jenjang anguba team nungya Shisalen Riju nungi Sungdienla L Ozukum aser Nungsanglila Jamir liasü.

Kasa sentong nung Assistant Commissioner Mokokchung, Ajit Kumar-i voters awareness indang onük nung jembidang, nisung ajak dang pei vote agütsütsü temeden amshitsü ajungshi aser vote agütsüba ajanga loktiliba aser yimtenren melenshir, ta ashi.

Election tiptema ochishia aser tesunep nung agitetsü sorkar ketdangsür mapa lir aser senso ajak teinyaktsüji pei vote agütsütsü lir, ta pai ashi.

District SVEEP Icons, Supongsangla aser Arenlong nungeria nisung ajunga dang vote agütsütsü ajungshi aser vote kajia tongtipang lir ta ashi. Aleyim Isaac Solo, EAC Mokokchung ajanga melepzüing o jembia iba sentong tembang.

NU Vice Chancellor-i "MassCom Chronicle" newsletter sayatsü

Dimapur, Rongchii/April 12 (TYO): Nagaland University indang headquarters, Lumami nung April 12, 2024 nü Newsletter "MassCom Chronicle" sayatsüba setong ka Department of Mass Communication ajanga ayongzüka liasü aser Vice-Chancellor, Professor Jagadish K Patnaik-i iba kaketsü sayaja liasü.

Iba sentong nung alakteta jaoker ama Yarenthung Ezung, Controller of Examination aser Albert Khizho, Finance Officer dena liasü.

Iba newsletter sayaba atema Vice Chancellor-i Department of Mass Communication nung kaketshir aser tesayurtem nem tenüngsang agüja liasü aser paisa campur alema oa osang prokshitsü asoshi ita shia osangkaket ka adoktsü ayongzüka liasü.

Naga nung dak sempet tajung jenti lir saka itemji junga mamshir, anungji kaketshir temi tongti shilem agia shisatsü, osangtsüsang prokshitsü nüngdaker, ta ashi.

Vice Chancellor-i iba department ya Journalism and Mass Communication ta melen nung ajungtsü aser Journalism

and Mass Communication nung Bachelor degree aser Masters degree tenzük nung ajungtsü ta ashi.

National Education Policy (NEP) nung mela aliba ama dual degrees agitsü nüngdaker ta pai ashi aser department dang kaketshir timba anioxtsü aser tesayur tali kumdaksütsü ajungshia liasü.

Iba sentong nung Shiken (2nd Semester) menden liasü aser Department of Mass Communication nung kaketshir temi pela agizükba ken ka aten aser A. Das, Assistant Professor ajanga tarur pela agizükba o jembia liasü.

Salonger Jamir aser Mercy nati department ajanga maparen balala inyaksangshiba osang den tayongzükba ajurubatem lemsatapa liasü.

Talikaba Ao ajanga Yimo zülur o jembia aser iba sülen Vice Chancellor, Prof. Jagadish K Patnaik, Nagaland University ajanga iba newsletter sayatsüba den külemi tayongzükba o jembia liasü.

Iba sentong nung Wapangsunla Longkumer, Guest Faculty ajanga melepzüing o jembia liasü.



Aam Aadmi Party (AAP) pusemertemi party tekolakba aser Chief Minister Arvind Kejriwal pusema poster tem maloktsüba noksa nung angur. Kejriwal ya Delhi excise policy ken o nung April 15 nü tashi judicial custody nung ayutsü.

Sisodia-i bail meshiba atema telangzüba agütsütsü Delhi court kati tetuyuba agütsü

New Delhi, Rongchii/April 12 (Agencies): Delhi court kati Hokolbarnü Aam Aadmi Party (AAP) lenir Manish Sisodia-i interim bail meshiba dak sendakba nung telangzüba agütsütsü atema Enforcement Directorate aser Central Bureau of Investigation (CBI) nem osang agütsüogo. Sisodia ya Delhi excise policy ken o nung aija tepuokdak yua lir aser pai taruba Lok Sabha election atema nüboyimba sentong nung shilem agütsü atema interim bail meshiogo.

atema mepeshiba angadangsü imlar. CBI aser ED napronglai Delhi excise policy yanglushiba mapang inyakyim shitak benoka minyakba ngutetogo ta ashi. Policy yanglushiba mapang license bena alirtem nem maangka aika agütsü, license taah magi mesüra ishiba agi aser ketdangsürtem ket nungi temelaba magi-i license tem atsülangja liasü.

CBI aser ED nati ashiba agi, ken o nung sendaka aliba beneficiary temi ochi meshi-i aazükba sentem aija aliba ketdangsürtem nem agütsü aser parnok inyakyim meputetdaksütsü atema parnok indang kaket nung kulitem teyazü mangaoka yua liasü.

Iba ken o dak sendakba nung Sisodia ya Central Bureau of Investigation (CBI)-i 2023 küm February 26 nü apu. Iba sülen Enforcement Directorate (ED)-ia CBI benokba FIR nungi adokba ken o dak sendakba nung Sisodia ya 2023 küm March 9 nü pua liasü.

Kasa ken o nung Delhi CM Arvind Kejriwal-a April 15 tashi judicial custody nung ayutsü tetuyuba agütsüogo. Pa apuba atema tashishiba agütsüba Delhi high court-i magizükba sülen Kejriwal-i kasa ken o ya Supreme Court nung benokogo.

Kejriwal-i temepeshiba agütsüba nung, ED indang chargesheet nung pa anema kuli tejangja mali anungji pa apuba ya ozüing alema lir, ta shia lir.

Indian Army-i Sikkim nung anti-tank guided missile tendangogo

New Delhi, Rongchii/April 12 (Agencies): Indian Army Trishakti Corps-i Brehostibarnü Sikkim kübok tenem nung süklep 17,000 shi tur exercise agiba mapang anti-tank guided missiles (ATGMs) takok ngua tendangogo, ta Guwahati indang Defence PRO-i ashiba news agency ANI sangdong ka ajanga metetdaksüogo.

exercise nung shilem agia liasü. Kasa sangdong ajangsa, exercise nung training agiba, sabang balala nungi arakzüa aliba aser marakzüi aliba target balala dak injang khaloktsüba densema liasü.

Army-isa, armoured gari aser hadir balala raksatsütsü asoshi ATGM units dak tashi aliba sayuogo aser iba ajanga tenem nung tetsükdaksü aika alidak mission tem takok ngua inyaksü tashi aliba sayuogo, ta ashi.

Taoba Hopta April 3 nü India-i, Odisha tzüküm nungi pilar aliba Abdul Kalam asetkong nungi new-generation nuclear-capable ballistic missile 'Agni Prime' takok ngua tendangogo.

Iba missile tendangba ya Chief of Defence Staff Gen Anil Chauhan, Chief of Strategic Forces Command,

DRDO nungi ketdangsür tejentem aser Indian Army-i asadanga liasü.

'Agni Prime' mesüra 'Agni-P' ya Agni class missiles advanced variant ka lir aser iba missile nung nuclear dena bentettsü. Iba ya two-stage canister missile ka lir aser km 1000 nungi 2000 tashi khatettsü.

'Agni Prime' missile ta taoba mapang Agni series missiles den medemdangra tebongbaba lir. Iba missile ya Agni 3 missile dang nungi shilem 50 agi tebongbaba aser guidance aser propulsion systems tasen keta lir.

Taoba ita India-i linük nung yangluba Agni-5 missile takok ngua tendangogo. Iba missile indang range ya km 5000 lir aser iba ya Asia nung tesem balala, China nung anütoklentip nung aliba tesemtem aser Europe nunga tesem kar nungbo khaloktsütettsü.

Bengal CM Mamata-i BJP aitsü

New Delhi, Rongchii/April 12 (Agencies): Bengaluru Rameswaram Cafe blast ken o dak sendakba nung nisung ana state police-i ghonda ana tsüingda apuba sülen Chief minister Mamata Banerjee-i ken o pelepsatsü merangba atema Bharatiya Janata Party (BJP) aitsüogo.

"Parnok (BJP) rongnung propaganda specialist ka lir. Bomb ya Bengaluru nung apok. Aija alirtem ya dena Karnataka nungi lir. Parnok Bengal nungi masü. Parnok Bengal nung ghonda ana atsük aser police-i parnok ghonda ana tsüingda puogo," ta Banerjee-i Cooch Behar nung election atema nüboyimba sentong ka nung ashi.

Bengal kümzüka mali ta ashiba dak sendakba nung telangzüba agütsüba mapang lai iba olen lemsatep aser meyiper Delhi, Uttar Pradesh, Rajasthan, Gujarat, aser Bihar kümzüka lir asü ta asüingdang.

National Investigation Agency (NIA)-i temulung meleme bilemer ana apuba sülen BJP-i Bengal sorkar aija liasü.

"NIA-i Rameshwaram Café nung bomb pokloksür rongnung temulung meleme bilemer Mussavir Hussain Shazib aser pa nem teyari agütsüsang Abdul Matheen Ahmed Taha na Kolkata nung puogo. Tenaprongla ya Shivamogga, Karnataka nung ISIS cell nungi

lir. Tia maka Mamata Banerjee lenisüba nung West Bengal ya kiralongrartem atema tejenokdak ka kümogo," ta BJP indang Bengal co-in-charge Amit Malviya-i X sabang ajanga ashi.

Kasa mapang nung TMC lenir Kunal Ghosh-i, temulung meleme bilemertem apuba atema West Bengal Police nem tenüngsang agütsüogo aser ashiba agi, police-i shilem tajung agiba atema NIA-i tenüngsang agütsüogo. "Anti-forces kechi südir süang ajak kanga sashia azüoktsüla. Ajisüaka ni @BJP4India aser parnok sülen anidakertem dang nisungtem ya kong nungi apu? KANTHI (Contai) nungi masü na ta asüingdangner. Asenok ajaki koba kibong aser BJP leniri Contai nungi ozüing alema inyaksangshir aji jangja lir. ANTI-FORCES nem tejenokdak agütsüba nung koba kibong sendak ali aji jangjatsü atema State agency tem nem bushisüingdang südaksüner," ta Ghosh-i X sabang nung zülutsü.

East Midnapore nung Contai ya BJP legislator Suvendu Adhikari shiba state assembly nung opposition lenir lir, pa aser par kibong tamendakdak ka lir. Adhikari-i ashiba agi, West Bengal ya international kiralongrartem atema tejenokdak ka ta maneni kuli agütsüogo.

Omar Abdullah Baramulla Lok Sabha menden nungi tokteptsü



asaba BJP anema lir," ta paisa shisem.

NC tatong Tir Omar Abdullah ya 2009 küm sülen tang mezüngbuba Lok Sabha election nung tokteptsü renema lir. Article 370 aginba sülen Jammu & Kashmir state maküm tashi pa election nung metokteptsü ta nangzüker aliba melenshia Abdullah-i tang election nung tokteptsü telemtetba agiogo.

New Delhi, Rongchii/April 12 (Agencies): Jammu Kashmir National Conference (JKNC) Tir Farooq Abdullah-i Hokolbarnü sangdong ka ajanga, North Kashmir nungi Lok Sabha election nung Omar Abdullah tokteptsü ta sangdongogo.

Baramulla Lok Sabha kübok assembly segments 18 lir aser delimitation sülen temelenshi adokba ajanga iba menden akoktsü atema temela masü kümogo.

Party tatong Tir aser taoba mapang chief minister ya Baramulla parliamentary constituency nungi tokteptsü aser lenir tejen Ruhullah Mehdi, Srinagar Parliamentary constituency nungi tokteptsü.

Peoples Conference tekolakba Sajad Gani Lone ya iba menden asoshi National Conference (NC) atema tetsükdaksü tulu ka asütsü imlar. NC candidate tem Budgam, Beerwah, aser Bandipora amala tesem balala nung Shia puri pusemstsü timla nung inyaksangshidar.

"Ni North Kashmir nungi tokteptsü atema telemtetba agiogo, kechiyong BJP-i North Kashmir dak kanga rangloker inyakdar. Ni iba tashi ya North Kashmir nung tamakok ngudaktsüner," ta iba osang sangdongba sülen Omar Abdullah-i ashi.

2019 küm delimitation sülen Budgam district nungi Shia pur timba aliba assembly menden ana densema tanga menden ishika bendenloktsü aser iba ajanga electoral landscape melenshia liasü. Taoba mapangba iba menden ya NC puri amokbanger aruogo aser Congress aser PDP natia iba menden nungi takok nguogo.



Coimbatore nung taruba Lok Sabha election magi tsüingda Congress leader Rahul Gandhi aser Tamil Nadu CM aser DMK tekolakba M.K.Stalin na lokti senden ka nung shilem magi tsüingda renemshiba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 13, 2024

'High Command' aser 'Central Leadership'

- P Tiamongba Aier

India nung 18 buba Lok Sabha elections agitsü mapang tonga arudang BJP-i anir NDA nung densema aliba teloktem aser külen opposition teloktem lokteper tentetba INDIA bloc teloktemi takok ngua Centre sorkar akümtsü atema kanga dang meranga nüboyima arudagi. 2014 Lok Sabha elections nung BJP-i menden 282 nung takok nguteter parnok den yariteperitem den külemi National Democratic Alliance (NDA) sorkar aküm. Prime Minister Narendra Modi lenisüba kübok mezüing NDA sorkar kümsük abensaa inyaker 2019 nung Lok Sabha elections agidang ano BJP tesüiba dang nungi menden teimba- 303 nung takok ngur tanabuba NDA sorkar kümer yimsü süa arur. Taküm Lok Sabha elections nunga BJP-i anir NDA teloktemi kümsük tasemben sorkar küma yimsü asütsü atema kanga meranger aser BJP-ibo Lok Sabha menden 370 tema angutsü alizüing yua lir. Külen, kümsük ana tashi linük madak yimsü süa arudang BJP-i aniba NDA sorkari opposition samatsütsü meranger ta tai tonglokja Congress-i anir BJP anemba political party tem tangatettep kati arua yaküm Indian National Developmental Inclusive Alliance (INDIA) ta ser bloc ka tentetogo. Parnoki taküm Lok Sabha elections nung BJP-i aniba sorkar atsüingdoktsü alizüing yur inyaker. Tanü Opposition-i adokba ola kaji BJP ya Hindutva nung amendaker inyaksangshiba telok ka aser parnoki India ya Hindu linük ka kümdaktsütsü nükjidong lir ta asüba onük lir. Iba nungji ajemdaker opposition-i Prime Minister Narendra Modi-i aniba sorkar atsüingdoktsü tayongzükba agüja nübo ayimer. Atangji mi melira mokozü madoker ta jembia aruba ama Opposition-i ashiba ya shitak ama bilemer kechiyong kümtem süia arudang BJP-i sorkar yimsü süa aruba state aika nung Hindu tamangba yimsü dak rangloker temzüing-ozüingtem yangluogo aser item ama state nung Khristan o Muslim nunger reshikangshiba manener. Naga nunger BJP lenirtemi anir linük nung BJP lenirtemi BJP ya secular party ka ta shiyonga arur saka parnok inyaksangshi jagi ibaji mesayur. Lok Sabha election 2024 tonga aruba mapang tanü Naga nunger aika terata ka nung lir. Osangkakettem, social media balala aser ano tanga sabangtem nung Khristantemi BJP nem vote meinoktsütsü tayongzükba aika agüja arudar. Külen, Nationalist Democratic Progressive Party (NDPP)-i anir People's Democratic Alliance (PDA) sorkari BJP den tesentaktep ayubaji Nagaland renloktsü aser ajangzüktsü atema anungji Centre nung maneni PM Modi lenisüba sorkar arutsü atema vote enokjang ta ajungshir. Iba ajanga Naga nunger kanga ratadaktsür kechiyong asenok dak ruling government nung adentsüba tangatetba ka aliba agi BJP yaritsü asü mesüra meyaritsü ta asüba teratabaji adoker. Tesüiba nung Congress-i aniba United Progressive Alliance (UPA) sorkar mapang telemtetba aika parnok UPA sasep nungsa angatettepa agiba nguogo, saka tanübo NDA sorkar ta ajayonga BJP-i dang telemtetba agiba aser ibajia BJP lenir kari dang agia inyaksangshir ama repranger. UPA nung political party aika teloktep nung denaka parnoki Chairperson ka shimteta inyakba nguogo saka NDA nungbo iba mapaji balaka majiteter. Külen, Congress inyaksangshi nung 'high command' ta ser lemtet agiba tematiba menden ka ama inyaksangshia arur saka BJP nungbo ibaji mangur. 2014 Lok Sabha elections magidang BJP-i Congress high command aija nüboyima liasü saka tanü asenoki BJP-i tesüiba küm ter yimsüsüba meyipa reprangdangra 'central leadership' tasa jembia aruba nguogo aser ibaji Prime Minister Narendra Modi aser Union Home Minister Amit Shah na ama dang inyaka aruogo. Anungji iba nung taitsü ka keta angubaji 'high command' masü 'central leadership' ta ang ajar süra tena madak ya asenoki manguba 'high command' ka lir asü aser itemji shirnok ta tasüingdangba ka arur. Atangji iba 'high command' jagi sorkar ketdangsubaren len anir süra opposition-i ashiba amaji BJP nem taruba kümsükji sorkar yimsü sūdaktsüra India ya Hindutva linük ka akümtsüji ana nung dang lir. Anungji Nagaland nung BJP lenirtemi anir NDA nung yaritepba teloktemi item terataba ya agientsüsa kuli tejangja agütsütsü mapang ka tang ya lir.

OLEMSABANG

Naga kin lia aruba

M.Meren Ex.Pastor Ungma

(Yashi adok nungi...)

BRITISH NUNGERI NAGA NUNGER DAK AJITETBA

British nunger O Naga nunger na mapang tatsüka külemi lia arudang Naga nunger ya mezüing lipok nungi pei sasa liteta lia arutetba kin ka ta ajiteta tarutsü nunga parnok ya pei sasa nüchiso tia nung lia otetsü parnok dak temeten lir ta ajitet aser parnok ya tenem kin sa asüyonga kin balaka ta züingshia aru aser iba mapang nungji ano Assam Governor Robert Reidi paia Parliament nung yamai ashi," Naga nungerji India nungera masü kechiaser parnok kenyonji shilu balala, ano parnokji Burma nungera masü, parnokji Hindu yimsü aser Buddhist yimsü mesüra Muslim yimsüa amanga benshiba kin masü, kechiaser parnok tamangbaji kenyonji balaka lir anungji bendangertem mashi mashi Naga limai manioktsüla ta 1873 nung Eastern frontiers Regulation Act 1873 nung perokshi.

Ano British nungerisa 1919 Naga nungerji Backward Tract ta aja, anungji India nungeri kechi ozüingasa renema lemtetdir Naga lima nungbo mamshitsüla ta sangdong.

Ano 1935 küm British Parliament House of Lord Act ajanga Naga Hills British District, British India Empire nungi Exclude asüba osang sangdong. Anungji Naga nungerji tetenzük nungi balaka pei sasa lia aruba kin ta British nungeri yakta nungi ajiteta aruba kuli sayuba angur.

MEZÜINGBUBA INDIA ELECTION.

India nunger Nüchi tia ngur külen mezüingbuba Electionji 1952 nung agitsüsa mapang tonga aru, saka Naga nungertembo British nunger dang nenok oadok dang onokbo nenok arudang onok koda pei sasa yimsü süa liasü yamaji tang toktsür oangma no ta jilia shir liasü. saka British nungertemi asenok Naga kintemji India nem toktsür oadok. Iba jagi joko India Election nung adentsüsa aküm. Saka mezüing asen Naga lenirtemi Naga nungertem 1947 August 14 nung India nunger dang anogo ka agi jilia Naga Nüchiso nguogo ta alima dang sangdonger liasü, (declared) Aser iba copyji (1) Government of India num ka (2) United Nations cable ajanga perokshi, anungji India Election nung adentsü menüingdaker ta ser Naga kin ajak India Election nung Shinga madentsü songtem aser yamaji shilemji magi. Aser Naga nungertembo pei sasa dang yimsüsüa alitsü nübur ajungai molunger ta 1951 May 16 nung temeyong anemba (Plebiscite) 99.9.o/o liasü. Anungji India Election nung atentsü menüingdaker ta nübur ajungai angatet. Ano tanabuba election 1957 nung ajurudanga kasaji Naga nungertem Shinga maten, iba amaji mezüing Naga lenirtemi meranga tasü ita pei nüchiso atema nokdaka aru. Ano ajidang masü saka India nem ali melen (tax) magütsütsü Naga nübur ajungai molungsoa aküm anungji iba meji Goan bora ajak Jorhat jail-i aotsü order aru aser Ungma nunger Jentisangbo Jorhat Jail nung sūdaktsü. Item ajakji Naga nüburtemi molungsoa arema aben. Joko iba mapang nung jagi Naga lima nung rishikangshi tetenzüker aküm. Saka nüburi pei nüchiso atema tasü tonga arem.

MEZÜING NAGA LENIRTEMI P.M NEHRO DEN AJURUTEPA

Naga National Council President A.Z. Phizo aser Vice President Imkongmeren aser Khodao par asem India P.M. den ajurutepa Naga yimden jembitsü tenzük, saka idangji P.M.-I ain adoka ashi, Naga nungertem anüing mekepzüka aruyonga aser India lima azü agi ayong ama ayimyonga Naga nunger nem Independence magütsütsü ta langzü. idangji Naga lenirtemi langzüa ashi, onoki nenok dang Independence meshir masü saka ozü tetsü-tebu nungi nenok India kübok melidang aser ozü limaji Independence lima lia aruba lir, anungji ozü lima toktsür oang ta langzü. Ibaji meeting tatem liasü. Mezüing Naga lenirtemi pei tetsü taso lima asoshi meranga rara nokdaka aruogo, saka tanü jenjang nung Naga lanurtem tanü putu kolen aor? Tsüraburtemi joko senpak ka nung hiki asembo nguogo joko hiki ka jenjang tang bushitsü tasa jembia aru aser aji asenoki asayar ama bilem saka aji shidak liasü, saka tanü putui senpak ka ajunga to belentokaogo aser aji joko bushiyonga mangutsü südi.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uganda nung yimsü mechi tamangertem reshikangshi

Nairobi, Rongchii/April 12 (Agencies): Taoba ita Uganda anüdoklen tesem balala nung tamangba yimsü mechi evangelist ka tepsetba aser tetsü ka aser lar jala arishi küm 10 tanur ka dak mi agi aruba osang temai adok.

Iganga District nung aliba Nakalama Sub-County kübok Busei B yimdak Muslim nungeri Ronald Twinomugisha dangi amokmerena text message yok aser March 30 nü lepset. Pa arishi küm 32 liasü.

Twinomugisha ya Uganda anüolen tsütsü nungi February 2022 nung iba tesem yagi arua liasü, aser 2023 tashinung pai Muslim nunger nisung pezü Khrista dangi anir aru ta osang ajanga ashir. Kinunger temi amokmerenba ajanga par pezü ya dangaleni ao.

"2023 küm March ita Twinomugisha ya kü indang office-i aru aser Muslim nunger temi pa amokmerena message yokba indang ashi. Muslim nungertem Khrista dangi temulung meyipba indang parnokki ashishia liasü," ta yangji aliba chairperson Gozan Waiswa-i osangbener dang ashi.

Nikongdang 7:00 ako meta nisung kar Islamic süoshi agir Twinomugisha'er kidangi aiba kidanger temi angu, ta ashir.

"Aonung 8:00 ako meta teyari meshia ayimtenba angashi aser iba sülen süng paksar ama ni ola ka angashi. Iba ola ya tulu liasü aser "Imlibilema ni tetepset! Imlibilema ni tetepset! Ni Yisu Khrista asoshi inyaker! Imlibilema. Yisui ni yok!" ta ashiba ni angashi. Ni kimai ayazüka alutsü tsüboa ait saka mapang tatsüka lir iba ola anen," ta nisung kati security mechi pa tenüng miimshia ashi.

Tasüngnep kidanger temi Twinomugisha tasümgang ya azü agi yimbanger pai kima angu.

Lendong agütsür temi tezüluba ka yuja liasü aser yangji "Nai kechi sayua aru, aser Muslim nungertem mashi lenmangi aniba aser Allah nungi yimsü tai leni parnok anir aoba onoki angazükogo," ta shia liasü.

Police temi tasümgang ya post-mortem atema mortuary-i bener ao aser temulung melema aliba nisung pezü bushi tenzüük.

Twinomugisha-i pa takum alitsü asoshi liquid soap yanglua liasü aser lanur aika nem iba yimya sayua liasü.

Ano anasa aliba Namutumba District nung alir arishi küm 33 tain Zafara Nagudi-i ashiba agi, March 25 nü lar jala arishi küm 10 tain Sharifa Nangobi tena Yisu tenüng nung sarasadema aliba mapang Muslim nunger la kinungbo kidangi aruba memeteti liasü.

Namutumba Town Council nung alir Nagudi aser lar jala ya Kaiti trading center nung open-air evangelistic sentong ka nung Khrista dangi temulung meyipa liasü.

Aonung 9:00 ako meta la sorochioka lia la kinungbo arishi küm 37 tain Musobya Mujjibu-i parnok sarasadema aliba angu. Ano lar jala arishi küm tenet tanur ka kinunger kidang liasü.

"Am yanglutsü atema ni tsü tsükdakja liasü. Aoksa kü kinungbo kishizüng nung nokdaka aliba ni angu aser jala küna sarasadema aliba idangji anen," ta Nagudi-i osangbener dang ashi.

Onok kechi süa liasü ta pai asüngdang aser lai kecha melanzü aser pai maneni asüngdang.

"Tatem nung ni asen kibong yaritsü atema Yisu Khrista dang sarasadema liasü ta ni ashi. Pa kanga ain adok aser 'Ni ajak angashiogo saka ni

süngmanger! Na Khristan asü Muslim?' ta asüngdang."

Lai la kinungbo dang ita trok tejakdang la Khristan yimsü agizüker tekülem ki ka nung tekülem sentong nung shilem agia aru ta ashi.

"Idangjisa pai küdak teka agi ama, metsü aser atsüng. Pa kishilen nokdaka liasü asünung onok jena motet. Pai tsü tatsük ji bena arua jala küna dak mükeploksü," ta Nagudi-i ashi.

Mujjibu-i parnok tepsetogo ta bilemer kidang nungi ao aser lai phone bena arur anasa yimsüng ka nung la teyi dang ashi aser motorcycle ana nung parnok arua temang anepalutsü asoshi medical clinic kati anir ao.

Nagudi ya süoshi temelem agia aliba yong tzü tatsük agi tajemba alet saka lar jala süoshi tapu agia alinung la tesashiba alet, ta lai ashi. Tena ya clinic nungi April 3 nü yok aser kinunger ka kidang alir ta ashi.

Uganda nung Khristanpur jenti reshikangshiba nung iba tatalokba ya tasenba alitsü.

Uganda indang constitution aser danga ozüngtem ajanga pei tamangba yimsü dangar den lemsateptsü aser tamangba yimsü ka nungi kati melentsü densema tamangba yimsü temeden agüja lir. Uganda nütsüng yongsük shilem 12 dak tema Muslim nungertem lir aser parnok ya timba linük anüdoklen alir.

ANO GO ABEN TSÜNGREM DEN

Taochi, Yimlibilem aser Tesünep

Tamang nung kü chichiba techir Timoti dangi Tebu Tsüngrem aser asen Kibuba Khrista Yisu nungi taochi, yimlibilem aser tesünep sang.

1 Timoti 1:2.

Nai ner kibong aser tembartem atema koda sarasademmer aji tongtipang lir. Nai meimer atema sarasademtsütsü Laishiba nung agüja aliba ama sarasademtsütsü dak alema tanga lemanng tajungba mali. Tsüngremi anebalur nem tejangja sempet agütsütsü asoshi Pauli teti sarasademtsü. Timoti asoshi pai Tsüngrem dang taochi, yimlibilem aser tesünep agütsütsü mepishi.

Taochiji Tebui pei chirtem nem angati agütsüba sempet lir. Kibubai asenok den Pa taochi ajanga dang sendakteper. Asenok mejungia Kibubai taochi agi asenok nem tekümtet agütsür (Ef. 2:8). Pai taochi agi asenok kotak Rongsentem agi asenok moatsür. Timtem mapang nung Pa taochi agi asenok nem tesünep agütsür. Pa taochi agi anogo shia asenok nem tajung bener arutsür (1 Tim. 1:14).

Taochiji asenok menen asoshi merenshitsü aliba, iba temerenshi Tsüngrem sotba. Asenok temenen taaji tasüba, aji saka Yisui iba temerenshi taaji asenok asoshi agütsü (Rom 6:23). Asenok temenen nungi temulung meyipa tekümtet agizüktsü asoshi Tsüngremi mapang tajung agüja temerenshi magütsüi talang ka aremzüka atar (2 Peter 3:9).

Tesünepjikodang asenoki Tsüngrem taochi aser yimlibilem nung amangdir asen temulungjang nung tesünep alir. Tsüngrem taochi-i asenok sota alir ta metetba ajanga temulungjang nung tesünep alir (Fil. 4:7).

Aseni Pa dang nangzükba nung tamakok ngua, Pai asenok dang taochi sayutsü ta Tsüngremi nangzük. Iba tejangja tenangzükba jagi asenok nem tesünep agütsür.

Alimai agütsüba tesünep ama Tsüngremi agütsüba tesünepji masü (Yn. 14:27). Alimai samaa aoba rongsen; drug, yi, tsüngi o agütsüba mesüra ken pelaa alitsü mapa agi asenok tebilemetsü süneptsütsü meranger. Tsüngremi agütsüba tesünepi tanela, temulungjang tonga aier aser süneptsür.

Nai meimer atema nai koda sarasademmer? Tsüngrem dang parnok nem taochi, yimlibilem aser tesünep agüjang ta sarasademba dak alaka tajungba lenmang mali.

Macau Catholic temi Israel-Hamas rara nung timtemertem yarir



Macau Catholic Churches rongnung aliba St. Lazarus' Church.

Macau, Rongchii/April 12 (Agencies): Israel aser Hamas tsüngta raraba nung timtem ajururtem yaritsü asoshi Macau Catholic Church indang social service arm ajanga sen US\$123,940 bendenogo, ta osang ka ajanga ashir.

Iba sen ya arogo nunger aser arogo-i tenzüükba lokti tentet balala nungi Caritas Macau ajanga Christmas

mapang nungi bendena arur, ta iba lokti indang secretary Paul Pan-i ashi.

Sen ya Palestinian refugees aser linük telung nung prokshia aliba Israel nungertem yaritsü atema Caritas Internationalis dangi yok, ta Pan-i ashi. Caritas Internationalis ya alima nung aliba Catholic charities ajanga kumtetba lokti tentet ka lir.

"Iba sen ya timtemertem

yariba nung amshitsü. Onoki tenüng teta magütsü. Iba tenla benden tenzüükba mapang nungi iba sen ya rara nung timtem ajurua alirtem yaritsü asoshi lir ta jembia arur," ta Pan-i ashi.

"Onoki refugee tem asoshi sen bendener, aser parnok karbo tekülem ki balala nung alir. Tekülem ki tem jenokdak tesem kumogo. Saka teyari nüngdakba tensa balala nung ibai ka lir," ta pai ashi.

Caritas Internationalis-i iba lima nung nüngdakbapur yaritsü asoshi ayongzükba ama Caritas Macau-i telangzüba agüja arur, ta ashi.

Christmas aser Lent mapang sen ya campaigns ana ajanga bendena aru, ta pai ashi.

Nüngdakba yaribo sen ya kanga ajema alitsü, saka nüburtemi telangzüba agütsüba jangratemtsüka lir, ta Pan-i ashi.

School tem nungi kaketshir aser tesayur temi tang tashi parnok indang 'piggy banks'

yoker, ta paisa ashi.

Macau nung aliba Catholic nungertem yagi taoba mapanga timtem nung alirtem asoshi teyari balala agüja aru aser item rongnung Turkey aser Syria nung menoknok agi timtem ajurua alirtem yaritsü asoshi Macau nunger sen million pezü bendena yoka liasü.

Ano April 3 nü Taiwan nung menoknok anokba mapang timtem ajurua alirtem asoshi St. John de Britton School ajanga sen benden tenzüka lir. Iba menoknok lendong nung nisung 16 asü aser meyirijang ka dak tema yiru aser ki noklang dak tema raksaa liasü.

Macau dang Macao ta ajar aser iba tesem ya 1557 nungi 1999 tashi Portuguese colony ka liasü aser iba ya China nung special administrative region ka lir.

Macau nung nütsüng yongsük 700,000 shi lir aser yangji arogo toku nungi Catholic nunger 30,000 shi lir.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Sümanga

(adv) kecha memeteti amuzüka aoba (go into a deep sleep)

* Lokti senden telidak nung ni khen sümanga amui ao.

Sümangkong

(n) jara longer arju nung ayuba (huge rolled up mat keep at morung)

* Arju nunger arür den raratsü angazük dang sümangkong yur alemshishir.

OLONG PAITEP # 6755

13x13 crossword grid with numbers 1-13 indicating starting positions for words.

TIPIEN

- 1. Tanidaker - 7
4. Temulung tesangwa - 6
6. Mezüng - 4
8. Langtem - 5
11. Kecha maka - 4
12. Meimchir - 6
13. Tzüzüng ozüng - 7

LANGTSÜNGLEN

- 1. Tetsüng sobotsü - 8
2. Temeshi pur lima - 5
3. Teni nungi aluba - 6
5. Tai melen kecha mashi - 4
7. Anü adokli - 8
8. Süoshi pudaka ayuba yinzü - 4
9. Tamang; tesangwa mali - 6
10. Ajitetter - 5

OLONG PAITEP # 6754 TELANGZÜBA

TIPIEN:

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN:

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

NAI-A YA METETTER MA

"LOWEST LIMBO SKATING"



Ahmedabad, Gujarat nungi arishi küm 6 tain Takshvi Vaghani-i Guinness World Records (GWR) ka ngutetogo aser ibaji "Lowest Limbo Skating over 25 m" atema lir. Takshvi-i iba ya yaküm March 10 nü takok ngua inyaktetaser Guinness World Records-i April 10, 2024 nung otsü agizükba metetdakja video ka lemsatepogo.

Assam nung BJP-i tetsürtem dak nungi tajangzük agir: Akhil Gogoi

Guwahati, April 12, 2024

(Agencies): Bharatiya Janata Party (BJP)-i Assam nung tetsürtem dak nungi tim masüba tajangzük agir ta Raijor Dal party tanishir Akhil Gogoi-i tai tonglochtsüogo.

Lok Sabha elections 2024 agitsü jakdang Akhil Gogoi-i iba ken o benokogo.

"State sorkari Orunodoi scheme atema shir sen agütsür" State senpong nungi agütsür, anungji Ashoka Pillar indang Lion Capital noksa alitsüla saka form nung PM Modi indang noksa lir. Sorkari taila forms alemer" ta Sivasagar MLA Gogoi-i ashi.

"State sorkari mapa asem inyaker, kaji taila Orunodoi forms alemer, sorkari SHGs sendentem tenüng amer tetsürtem BJP sendentemi jaoker aser noksa ka agiba sülen

Rs 10,000 agütsütsü nangzük" ta pai ashi.

Assam Legislative Assembly nung ration card alir tetsür shia nem Orunodoi scheme agütsütsü lemtetogo anungji kechiba BJP nem dang vote enoktsütsü jembir ta Gogoi-i asüngdang.

Election Commission of India-i SHGs dang awareness programme ka nung parnok votes enoktsütsü tezüngzüktep agitsü metetdaksüogo. Ajisüaka BJP züngsem aikati SHGs dang Lok Sabha elections nung BJP party nem vote enoktsütsü tezüngzüktep agitsü tuyur, ta paisa ashi.

"Himanta Biswa Sarma-i Assam nung ozüng alema mapa aika inyaker aser ni iba ya ashiba atema ni tepuokdak ayutsü mesüra taila khatapba nung khasettsü tasa atongtsü

akok" ta pai shisem.

Nübertemi opposition candidate tem nem vote enoktsütsüla kechiyong BJP-i linük ya tamangba yimsü nung ajemdakba linük ka kümdaktsütsü akok ta Akhil Gogoi-isa ashi.

Modi'er sorkari linük rongsen yokdoker aser iba nung ONGC oilfields dena lir. Iba ajanga mapa inyakdak mali kümogo. Kechisarena nung jenjang atuba ajanga nisungtem timtemer aser BJP ya jenjang atuba, tamangba yimsü aser privatisation inyakba telok ka lir ta pai aitsü.

Linük aser state kümzuka ayutsü atema Gaurav Gogoi aser Lurinjyoti Gogoi na nem votes enoktsütsü ayongzük. Lok Sabha nung Tapan Gogoi-i kecha mejembiteter aser shisatsü mali ta Akhil-isa ashi.

Congress-i süngolu nung mapa inyaker nem Rs 400 agütsütsü

Guwahati, April 12, 2024

(Agencies): Congress-i Shramik Nyay campaign kübok Assam nung süngolu nung inyaker shia nem daily wage Rs 400 agütsütsü nangzükogo.

2016 nung BJP aser Prime Minister-i süngolu nung inyaker shia nem Rs. 351 agütsütsü nangzuka liasü ta Congress lennir Jairam Ramesh-i ashi.

Ajisüaka, October 2023 nung ang Assam sorkari daily wage Rs. 250 tutsü, ta Ramesh-isa ashi.

Paanch Nyay Pachees Guarantee nung Congress

party-i nem sorkar akümtsü tashi agütsüra süngolu nung mapa inyaker shia nem anogoshia Rs 400 agütsütsü ta nangzükogo.

April 11 nü Congress MP Gaurav Gogoi-i Bharatiya Janata Party (BJP) den tesentaktep aliba nisung kar aitsüogo. Iba nung Assam Chief Minister Himanta Biswa Sarma aser central minister tem kinungertem dena lir.

Item nisungtem yagi Assam nung sen agi timtemba süngolotem alizük. Iba sülen tangar dang yokdoker ta

Gogoi-i ashi.

Iba ya electoral bonds dang nungi ashishitep mapa tuluba lir aser iba ajanga tarutsü nung süngolu nung mapa inyaker temi timtem ajurutsü ta Lok Sabha nung Congress Deputy Leader Gogoi-i ashi.

Iba inyakyim ajanga süngolu nung mapa inyaker nisung meyrjang aikati tetsükdaksü aser timtem ajurutsü ta pai ashi.

Süngo kibur ajungbena melenshiba ajanga mapa inyaker temi sen aser nüngdakba supplies mangur ta Gaurav Gogoi-isa ashi.

Priyanka Gandhi-i Tripura road show nung shilem agitsü

Agartala, April 12, 2024

(Agencies): Congress general secretary Priyanka Gandhi Vadra-i Tripura nung April 16 nü roadshow ka nung shilem agitsü.

Lok Sabha constituency ana- Tripura West aser Tripura East nung opposition INDIA bloc candidates pusemstsü atema iba roadshow ayongzüksü.

"Priyanka Gandhi Vadra-i April 16 nü Agartala-i arutsü aser nübertem dang INDIA bloc candidates nem votes enokjang ta mepishitsü atema roadshow

nung shilem agitsü" ta Congress MLA Sudip Roy Barman-i ashi.

"Iba mapang rally kecha malitsü saka roadshow nung lai Surya Chowmuhani anasa o jembitsü aser nübertem dang Lok Sabha menden ana nung opposition INDIA Bloc candidates nem votes enoktsütsü mepishitsü" ta pai ashi.

Roy Barman-isa nübertem dang roadshow nung shilem agitsü aser iba sentong takok ngudaktsütsü ayongzükogo. Tripura Pradesh Congress

president Asish Kumar Saha-i West Tripura Lok Sabha constituency nungi opposition INDIA Bloc candidate ama tokteper. Külen East Tripura Lok Sabha constituency nung opposition alliance candidate ji taoba CPI(M) MLA Rajendra Reang lir.

April 19 nü West Tripura Lok Sabha election aser Ramnagar Assembly constituency by-election agitsü. Iba sülen April 26 nü Tripura East Parliamentary constituency election agitsü.



Sainik School, Goalpara nung asür Major Ngangom Joydutta Singh indang kürakyanglu ka sayadang agiba noksa angur. Major Singh ya Vir Chakra (Posthumous) angur ka liasü aser Sainik School, Goalpara nung azüng. School ketdangpurtem den Sainik School Goalpara Old Boys' Association ajanga iba sentong agi aser Major Singh kinungtsü Captain Ngangom Subadani Devi (Retd)-i la kinungbo kürakyanglu sayatsü.



China ketdangsür ka North Korea nung arua linük ana tsüngta tesendaktep ulushitsü atema jembishinüa liasü, ta North Korea indang state media ajanga Hokulbarnü ashi. China indang National People's Congress indang mendenbuba Zhao Leji, shiba ruling Communist Party nung ketdangsür No. 3 ta züngser, aser pai North Korea nung Choe Ryong Hae den Brehostibarnü ajurua politics, economy aser sobaliba tsütsü linük ana tsüngta amalitep akatsü atema jembishinüa liasü.

Thailand foreign minister-i Myanmar den arrtsü semdang

Bangkok, Rongchii/April 12 (Agencies): Thailand foreign minister-i Myanmar den arrtsü anasa jila ka semdangogo, ta Ministry of Foreign Affairs-i ashi. Anogo ishika raratepa telungpurtemi military sorkar sepaitem mintokba ajanga iba tesem nung alirtem aika jenshia aoba sülen minister-i iba tesem semdanga liasü.

Hokolbarnü Foreign Minister Parnpree Bahiddha-Nukara-i ano Thailand nung Mae Sot jila aser Myanmar nung Myawaddy jila sendaktepba "friendship bridges" ana semdangogo, koba linük ana tsüngda shishilembaba tongtibang tesem ka lir.

Thailand Foreign Ministry-isa, pai Myanmar nung rara adokba ajanga jenshirtem agizüksü asoshi terenemshiba asadangsü, ta ashi

Iba hopta tetenzüklen Thailand-i ashiba agi, Myanmar nungi jena arur 100,000 agizüksü atema parnok renema lir. Ajisiüka Thai Ato Kilonser Srettha Thavisin-i Brehostibarnü, rara ya par linük indang anüng tashi prokshia meyoktsüla ta tekümdangtsü metetdaksüogo.

Iba hopta Myanmar military aser telungpur tsüngda raraba ajanga nisung aika Thailand-i jenaogo.

2021 küm military-i sorkar atsüngba sülen Myanmar nung mepetmesü tulu tsüngda aser iba ajanga nürburtem aika Thailand-i jenaogo. Linük ana arrtsü kilometer 2,400 lir.

Brehostibarnü Karen National Union (KNU)-i, military sorkar pusemba sepaitem atsüngtokogo, shirnok Myanmar tsütsü apu ka anasa jenoka liasü.

Rara tesashiba akümba sülen Myawaddy nungi Mae Sot jilai jena aoer iba hopta anasüa agi timba kuma anogo ka nung nisung 4,000 shi jena ao, ta Reuters news agency sangdong ka ajanga metetdaksü.

Myawaddy jila atsüngba ya

military sorkar atema maksü asütsü, shirok ita ishika tsüngda tesem aika nung tamakok ngua arudar aser iba ajanga parnok pusemertem military lenirtem aija arudar.

Myanmar military otongdar Zaw Min Tun-i Brehostibarnü ashiba agi, sorkar sepaitem parnok kinungertem teküzmükba kübok toktsütsü atema Myawaddy nung parnok tamendakdak nungi

atsüngintsüsa aküm.

Paisa, jenshia or aliba sepaitem dak sendakba nung sorkar aser Thai nung ketdangsürtem sensaksemdar, ta ashi ajisiüka osang tejangja magütsü.

Myanmar mepetmesü nung Thailand-i shinga pumesemi arudar aser taoba küm August ita Srettha tashi dangi aruba sülen kidanger linük nem teyaria agüja arudar.

Russia-i military trainer, air defence system Niger dangi yokogo

Niamey, Rongchii/April 12 (Agencies): Russia nung military trainer tem air defence system ka aser tanga hadirtem bener Niger tongogo, ta state media sangdong ka ajanga metetdaksü. Niger aser Moscow na tesendaktep akangshiba mapang tang iba jenjang ya agiogo.

Niger nung military sorkari January ita Russia den military tesendaktep akangshitsü atema telemtetba agiogo. Sahel linüktem nung telungpurtem den rara nung teyari agüja aliba France nung sepaitem mintokba sülen Niger-i iba jenjang agia liasü.

Broadcaster Tele Sahel-i, Russia indang transport tayimtsü ka Niamey airport tonga aruba sayuba den Russia nungi military equipment aser military instructor tem linük yimtiba tonga aruogo, ta metetdakja liasü.

Linük anüng ajunga aziüoka ayutsü atema air defence system amenoktsü asoshi Russia-i teyari agütsütsü, ta kasa sangdong ajanga metetdaksü.

State meyong Radio Television du Niger-i parnok indang Facebook page ajanga,

Russian military instructor 100 Niamey tonga aruogo, ta metetdaksü.

Ken o dak sendakba nung Russia-i kecha telangzüba agüja mali, shirnok Africa nung jenjang yanglushitsü merangdar.


Niger ya alima nung sensaktiba linük ka lir aser Sahel nung telungpurtem den raraba mapang anüolen aliba linüktem dak metaloker aruogo, ajisiüka taoba küm July ita military-i Tir Mohamed Bazoum atsüngtokba sülen Russia dangi meyipogo.

March ita Niger-i, United States den military tsütsü tenangzüktepba yanglur aliba agintsü telemtetba agi. Iba tenangzüktepba kübok Pentagon nem USD million 100 dak tema intoka yangluba drone base ka densema Niger nung base ana amenoka achayangtsü temelaba agütsür liasü.

Niger nung maneni US nung sepai 1,000 shi amenoka lir, ajisiüka coup sülen parnok inyaksangshi mesademi kümogo.

Kasa mapang nung telungpurtem den raratsü atema Niger aser kidanger linük Mali o Burkina Faso nung longjemogo. Linük anaprongla ya military yimsüsüba kübok lir.

US Tir Biden-i Philippines aser Japan yaritsü nangzük



Washington, Rongchii/April 12 (Agencies): China den tensa tamajungba akumba mapang ka nung US Tir Joe Biden-i Brehostibarnü Japan aser Philippines lenir ajuru aser linük ana den tashi ajak agi yariteptsü nangzük aser lenir aseme China inyaksangshi nung lendong aser tashiyim lir ta ashi. South China Sea nung Unites States indang security Biden-i akangshia liasü, kechiaser China aser Philippines rong tem tsüngta aiben mangatettep adokba ajanga rara tuluba tenzüktsü tsübor.

"South China Sea nung Philippines indang aircraft, rong mesüra armed forces dak makra, asenok tangatettep nung yanglua aliba defense treaty amshitsü," ta Biden-i White House nung Philippines Tir Ferdinand Marcos Jr aser Japan Ato Kilonser Fumio Kishida ajurudang ashi.

China-i South China Sea ajunga nung amai kibur akumtsü meranger, anungji Philippines densema Southeast Asian linük kari kibur kuma jembiba

tesemtema parnoki rakzüktsü meranger. Iba den ano China-i pei sasa yimsü asüba Taiwan asetkong-a par meyong ta ashiba ajanga Biden-i region nung tesendaktep yanglushitsüsa akum.

US tir aliba kidang East Room nung parnok ajurutepa jembishinü akaba ya otsü tasen ka lir ta US, Japan aser Philippines lenir temi ashi.

China tenüng metetshiaka parnoki Asia-Pacific region nung tesunep aser democracy atema par alliance ya tamendak dak lir ta ashi.

International order nung amendaka aliba ozüngtem shidak amshitsü temulungtetba tulu nung lir, ta Marcos Jr-i ashi. Pa jakdang Philippines tir inyaka alisang Rodrigo Duterte yabo China tsütsü tejak shir liasü.

Japan Ato Kilonser Kishida-ia "multi-layered cooperation" kanga tongtipang aser tanü senden yagi otsü yanglutsü ta ashi.

Senden amenba sülen lenir aseme Brehostibar aonung

menur "Joint Vision Statement" ka agütsüba nung rongsenketzüng aser defense tsütsü amalitepa maparen balala inyaksü shia lir aser South China Sea nung China-i lendong aketba tashiyim yimya amshiba aija liasü.

Australia ama partners tem den külemi linük aseme joint naval training agitsü ta sangdong nung shia liasü.

United States ya Manila den mutual defence pact ka lir, saka iba ya tendangtsü akok ta tsübor, kechiaser Spratly Islands nung aliba Second Thomas Shoal temeket nung tensa tali tamajungba akumer.

Philippines indang rong tem senzütsü temeden China-i aiben nokdangba aser Second Thomas Shoal dangi yokba supply lines tem nung timtem agütsüba ya lendong aser tensa tamajungba kumdaktsüba maparen ka lir aser iba atema süoki ia bilemer, ta lenir aseme lungjemer sangdongba nung ashi.

Japan Ato Kilonser Kishida-i US semdangba Biden-i mera keta agizüka China tashi ulushiba nokdangtsü nukjidong nung defense tesendaktep tajungba akumtsü sangdonger anogo ka lir linük asem lenirtem senden ya amen.

Brehostibarnü Kishida-i Congress nung jembidang America nung dang alima nung tashi tulutiba linük ama shilem agiba nung pei sasa temulung meleme malitsü ajungshia liasü.

China tashi ulua akumba ajanga timtem ajurutsü aliba tekum dangtsü metetdakja jembidang, World War II sülen mitkar temeden agientsüba sülen Japan-i tembar United States den khuret tali lemsateptsü aser abentsü asoshi tali inyaksü temulungtetba nung lir, ta Kishida-i ashi.

Kishida-i semdangba mapang United States aser Janap tenüng tajung nüshio, ta China-i aitsü.

Washington aser Tokyo-i Taiwan aser maritime ken o nung China anema inyaka China indang internal affairs nung teka sangshir aser international relations amokbanga aliba yimya nung kanga mejungi aibelen, ta Beijing indang foreign ministry odongtar Mao Ning-i ashi.

Biden-i Asia-Pacific nungi tembar linüktem jaoka senden amenba nung Japan aser Philippines ya tesüsaba lir aser August ita Camp David nung Kishida aser South Korea Tir Yoon Suk Yeol nati shilem agia liasü.

Ajisiüka Biden-i China den tensa ketdangsüa taoba hopta China Tir Xi Jinping den ghonda ana phone nungi jembia liasü aser tena November ita San Francisco nunga ajurutepa liasü.

Japan den defense tesendaktep ulushiba ya defensive atema dang lir aser linük ka nung tenük yokba mesüra region nung timtem agütsütsü merangba masü, ta Biden-i Bodhbarnü ashi.

Mary Kom-i Paris Olympics Chef-de-Mission mapa toktsüogo



Rongchii/April 12, 2024 (Agencies): World championship trokben koker aliba boxer M C Mary Kom-i Hokolbarnü taruba Paris Olympics atema India indang chef-de-mission mapa toktsüogo. Jurila maparen kar aliba ajanga la iba menden nungi atsüingintsüsa kumogo, ta Mary-i ashi.

Indian Olympic Association (IOA) Tir PT Usha-i sangdong ka ajanga, Mary Kom-i shiti ka ajanga la nem iba mapa nungi anisungzük agütsütsü asüingdangba indang metetdaksüogo.

"Takokba tashi linük tenzüksüji maongka tulu ka ama ni bilemer aser ni iba atema renema liasü. Ajisüaka ni jurila maparen kar adokba

ajanga iba mapa mebenettsüsa kumogo aser ni resign süner," ta arishi küm 41 tain yagi Usha dangi züluba shiti nung shia lir.

"Tenangzükba ka nungi atsüingitsü ya taktsüka lir, ajisüaka ni asoshi tanga lenmang kecha mali. Ni iba Olympics Games nung timla tulu nung linük nungi asayatem pusemstsü," ta laisa shisem.

IOA-i iba mapa atema la shimba March 21 nü sangdonga liasü.

Nüngtugu boxer, shiba 2012 London Olympics nung bronze-medallist ka lir, la ya July 26 nungi August 11 tashi asayatsü aliba asayamung atema linük indang contingent logistical in-charge liasü.

"Olympics nung medal ngur aliba boxer aser IOA Athletes Commission mendenbula Mary Kom jurila maparen ka aliba ajanga mapa toktsüba atema sasasetta bilemer. Onoki la telemtetba akümtsübur," ta Usha-i ashi.

"Ni ken o dak sendaka alirtem den sensak asemstsü aser yakta Mary Kom temelen shimba sangdongtsü," ta Usha-i ashi.

Usha-isa, lai shiti agizükba sülen Mary Kom den sensaksemogo, ta ashi.

"Ni lai mepeshiba angateter aser la telemtetba akümtsübur. Ni la dang ni aser IOA-i la teti nongita yaritsü ta shiogo. Maneni ni ajak dang la jurila maparen ya akümtsübutsi mepeshir," ta lai ashi.

Monte Carlo Open: Djokovic aser Sinner na quarter-i iogo



Rongchii/April 12, 2024 (Agencies): Tang asaya aliba Monte Carlo Masters nung Novak Djokovic-i Lorenzo Musetti koka quarter-finals tongtetogo. Tebur kija asaya nungsa Jannik Sinner-a quarter-i iogo ajisüaka Daniil Medvedev-bo tsükogo.

World number one Djokovic-i asaya junga metenzüktet ajisüaka pai world number 24 asayar Musetti 7-5, 6-3 agi kokogo, shibai taoba küm Djokovic kasa round nung tsükdakja liasü.

Quarter final nung Djokovic Australia nung 11 seeded asayar Alex de Minaur den asayatsü.

Djokovic-i Monte Carlo nung junga masayateti arudar

aser pai 2015 küm iba asayamung akokba sülen tang tashi khen danga quarter-finals adena asaya mali.

Tebur kija asaya nungsa Australian Open champion Sinner-i 6-4, 6-2 agi Jan-Lennard Struff kokogo. Pai taküm asaya 24 kokogo aser asaya ka nung danga tamakok ngua lir.

World number two asayar yagi mezüngbuba set nung 4-4 aliba mapang Struff indang serve break asü aser asaya akok aser tanabuba set nunga game 11 nungi teku koka asaya akok.

Pa quarter final nung Holger Rune den asayatsü, shibai taoba küm Italy nung asayar ya semi-finals nung tsükdaksü

aser final nung Andrey Rublev mekoki tanabuba jenjang nung tembanga liasü.

Rune-ia 7-6 (11/9), 3-6, 7-6 (7/2) agi Grigor Dimitrov kokogo. Pai iba asaya ya ghonda asem ser minute 30 nung koka liasü. Pai deciding set asayaba mapang game 12buba nung match point ana kümzükteta asaya akok.

Kasa mapang nung Medvedev 6-3, 7-5 agi Karen Khachanov agi tsükdaksüogo. Pa anogo anabuba atonga ketdangsürtem den asatepa liasü.

Tatembangbuba game nung Medvedev-i chair umpire Carlos Bernardes den asatepba sülen pa nem point penalty ka agütsü aser iba sülen ano pa asayamung supervisor dena asatepa liasü.

Iba asaya akokba sülen Khachanov quarter-final nung Stefanos Tsitsipas den asayatsü shibai fifth seed Alexander Zverev 7-5, 7-6 (7/3) agi kokogo.

Maneni tebur kija asaya nungsa De Minaur-i külem Australia nung asayar Alexei Popyrin 6-3, 6-4 agi koka quarter final tongtetogo.

Glasgow nung 2026 Commonwealth Games ayongzuka asayatsü akok

Rongchii/April 12, 2024 (Agencies): 2026 küm Commonwealth Games ayongzuka asayatsü asoshi tayonger ka mongui bushiba mapang Glasgow nung iba asayamung ya ayongzuka asayatsü akok.

Australia nung Victoria state-i taoba küm iba asayamung ayongzuka masayatsü atema telemtetba agiba sülen tayonger ka monguteti Commonwealth Games Federation (CGF) timtemba mapang ka lir. Inyaksangshi asoshi jenjang tali saka akümer ta shia Victoria-i iba asayamung ayongzuka masayatsü telemtetba agia liasü.

Asayamung ayongzükba nung intokba mesemtsü atema CGF-i pound million 100 agütsütsü ta shiaka Singapore aser Malaysia napronglai iba asayamung ayongzuka asayatsü memulunger.

Glasgow nung 2014 küm iba asayamung ayongzuka asayaago aser Commonwealth Games Scotland-i, public funds aikabo magitsüsa inyakyim ka benokdangogo.

Ajisüaka 2026 Games nung asaya 10 nungi 13 tsüingda dang asayatsü, koba 2022 küm Birmingham nungbo asaya 20 tashi asaya liasü.

Athletes' village ka melena 2014 Games indang venue aser tang aliba accommodations tem tanaben amshitsü.

"Onok nükjildingji 2026 küm iba asayamung ayongzuka asayatsü asoshi lir aser CGF-i iba dak sendakba nung tanga linüktem den sensaksemba osang angazüka onok tali ajungmesor," ta CGS-i Hokolbarnü ashi.

Victoria-i ajungbena iba asayamung ayongzuka masayatsü atema telemtetba

agiba aser asayamung asayatsü atema tanga tesem ka mongutetba ajanga Games tarutsü asoshi shisabulua bilemer. Iba asayamung ya küm pezü nung khen asayar aser asayamung nung toktepba team tem ya taoba mapang British colony tem lir.

Iba asayamung tesüsububa asayaba trok nungi pongubo Britain mesüra Australia nung asayaago.

Billie Jean King Cup: India-i 2-1 agi South Korea kokogo



New Delhi, Rongchii/April 12 (Agencies): India tetsür team-i Hokolbarnü tang Changsha, China nung asaya aliba Billie Jean King Cup Asia Oceania Group-1 tie nung South Korea team 2-1 agi kokogo.

Iba asaya akokba sülen India team Pool A nung tanabuba jenjangi tuogo. India tetsür team-i tang tashi nung asaya asem kokogo aser ka mekoki lir.

Korea den asaya nung World No. 379 Rutuja Bhosale-i kija asaya nung 6-2, 6-2 agi Sohyun Park akok.

Ajisüaka tanabuba kija asaya nung Korea tsür Sujeong Jang-i 2-6, 3-6 agi Ankita Raina koka kasasa aküm.

Kija asaya nung takok

monguaka Ankita-i tarep asaya nung Prarthana Thombare den longjemer Korea tsür Park aser Dabin Kim na 6-4 6-4 agi koka liasü. Iba asaya ghonda ka ser minute 33 asaya liasü.

India team-i iba asayamung nung Pacific Oceania (3-0) aser Chinese Taipei (2-1) kokogo aser China (0-3) mekoki lir.

Asia/Oceania Group I tetoktepba nung team trok nungi temaba jenjang nung tembanga team ana play-offs atema qualify asütsü aser bonglang nung tembanga team ana 2025 küm Group II-i alutsü.

India team Honibarnü group match asaya tatembangbuba ya pezübuba nung aliba New Zealand team den asayatsü.

BILEMDANGANG

"Pei temeden yoka chira olangtsü makatsü."